

En acquittant nostre temps vers jeunesse

Le nouvel an et la saison jolie,

Plains de plaisir et de toute liesse

Qui chascun d'eulx chierement nous en prie,

Venez sommes en ceste mommerie (1),

Belles, bonnes, plaisans et gracieuses,

Prestz de dancier et faire chiere lie

Pour resveillier voz pensees joieuses.

Or bannissiez de vous toute peresse,

Ennuy, soussy, avec merencolie,


Car froit yver, qui ne veult que rudesse,

Est desconfit et couvient qu'il s'en fuye !

Avril et may amainent douce vie

Avecques eulx ; pource soyez soingneuses

De recevoir leur plaisant compaignie



Pour resveillier voz pensees joieuses !

Venus aussi, la tres noble deesse,

Qui sur femmes doit avoir la maistrie,

Vous envoye de confort a largesse

Et plaisance de grans biens enrichie,

En vous chargeant que de vostre partie

Vous acquittiés sans estre dangereuses ;

Aidier vous veult, sans que point vous oublie,

Pour resveillier voz pensees joieuses.

1. Mommerie : Mascarade.

Charles d'Orléans (1394-1465)

